

禹貢注解

姚明輝著

讀經會印行



舟

621.13
4469

上海图书馆藏書



A541 212 0011 00468

禹貢注解鄒序

上海姚孟塤先生當代地學巨子也教授二十載名弟幾萬輩其私淑未列門牆者不與焉
 嗚呼盛矣甲寅春與鉅定交鄂渚相與論吾國歷史地理先生持議獨高謂禹貢爲吾國地
 志祖孟堅漢志紹九州之遺山經水經亦道水道山之意降而後漢晉南宋南齊北魏隋唐
 宋遼金元明諸史之志靡弗上師大禹下仿班志其爲夔楊顧弗重與鉅則以謂吾國自秦
 始郡縣天下年代短促未勒專書至孟堅始列爲志上承州國下續郡縣亟宜探討明確俾
 前後有所推尋庶幾數千年之因革損益觸目瞭然蓋鉅與先生所持雖異要以求歷史地
 理統系之志則一也今年冬先生復來武昌出禹貢注解相示折衷羣言參以己意其前賢
 持疑未決之條以譌襲譌之見並爲鈎通疏解剖晰分明於是益信先生趣舍之決與夫用
 力之勤迴視鉅之疏癩漢志圖說荏苒數年卒不一就者爲何如耶抑鉅又有說焉大禹承
 洪水猛獸之際財用至耗率天下之民奠水奠山而民不知勞既定矣等田均賦而民不知
 困是其調補懋遷之道殆有神乎是書所記之外者故克成此空前絕後之偉烈先生之疏
 解是書也意若曰今天下取財之塗至博而民生愈窘必將大禹之道行乎今之世庶幾吾

國可得而理豈第以考訂疏解爲功夫亦誘進邦人推神禹之道施於無窮也其釋今地悉以拙作京省道縣圖爲准而旁及於最新可信之圖參考之書都百八十八種爲文計二萬餘言誠讀禹貢之津筏也書成先生以鉅粗解渾蓋令序其首因述彼此持議之殊與夫先生注解是書之意俾後之君子有所攷焉中華民國六年歲次丁巳仲冬之月新化鄒興鉅伯庚甫識於武昌亞新地學社

禹貢注解自叙

予稟 庭訓鑽地學既二十年深知禹貢一篇精微廣大爲學者所必讀顧讀之未易得要領或苦經說之煩難爰本先儒羣說擇善而從且下己意爲之注解將以便初學非爲著作也稿既成念二十年來所領會者方自謂玄之又玄而求之此經則已包蘊而無遺朱子謂如一桶水點滴不漏信然今夫地學家孰不欲探兩極游五洲出巴拿馬破大西洋之浪踰阿刺伯颶鞭於撒哈拉大沙漠而後快哉然禹貢結處曰東漸于海西被於流沙其漸其被皆無所際則夫大洋大漠安知非漸被之所及者且朔南暨暨而爲盡也則是達兩極爲及也則是踰兩極其規模豈不大哉緯書訓海爲晦四海者四方晦地猶今言黑闇世界禹貢結穴在聲教訖于四海又何廣也嗚呼今地學家有所謂國家主義者有所謂世界主義者或主張自然地理或主張政治地理或主張交通地理說者紛如將自以爲高明吾見其莫外乎禹貢耳予於地學書無不觀而終謂熟讀禹貢爲至學故爲此注解古今禹貢注解將數百家其傳述書說及之者姑勿論第數專書載經義考已六十餘種自禹貢指南而後各本其時世以說經至於今五洲棣通矣乃益見經義之精微此所以爲疏通知遠之教也歟

予於斯學得胡氏渭禹貢錐指之門其今古文學說同異知孫氏星衍尙書今古文注疏爲備今此注解大半錄錐指蓋寢饋於斯二十年信錐指一書爲可尊也丙辰春稿旣殺青將歸呈家君是正記之如此三月朔日明輝記

禹貢注解

根據考訂

諸書目錄

是稿於丙辰夏既呈 家君略爲是正茲丁巳秋將授高等師範諸生爲文學課復加修飾以付手民印既竟錄根據暨考訂諸書如左目十月望日明輝又記

尙書注疏 孔安國傳 孔穎達等疏

經典釋文 陸德明

書傳 蘇軾

尙書集解 林之奇

禹貢指南 毛晃

禹貢論 程大昌

禹貢後論 程大昌

禹貢山川地理圖 程大昌

禹貢集解 傅寅

禹貢說斷 傅寅

書說 呂祖謙

增修東萊書說 時瀾

書說 黃度

書古文訓 薛季宣

書傳 蔡沈

尙書精義 黃倫

尙書詳解 陳經

尙書集傳或問 陳大猷

古文尙書鄭注 王應麟輯

初學尙書詳解 胡士行

尙書表注 金履祥

書經纂言 吳澄

尙書集傳纂疏 陳櫟

尙書輯錄纂注 董鼎

讀書管見 王充耘

尙書纂傳 王天與

尙書通考 黃鎮成

書蔡傳旁通 陳師凱

尙書句解 朱祖義

尙書蔡傳音釋 鄒季友

禹貢注解書目

尙書考異 梅鷟

禹貢圖說 鄭曉

尙書辨解 郝敬

尙書緯 孫穀輯

書經稗疏 王夫之

禹貢滙疏 茅瑞徵

古文尙書疏證 閻若璩

古文尙書窅詞 毛奇齡

禹貢長箋 朱鶴齡

禹貢錐指 胡渭

尙書解義 李光地

尙書地理今釋 蔣廷錫

鄭注尙書大傳 盧見曾輯

經典釋文考證 盧見曾

尙書小疏 沈彤

禹貢會箋 徐文靖

尙書集注音疏 江聲

尙書後案 王鳴盛

古文尙書撰異 段玉裁

禹貢三江考 程瑤田

尙書大傳鄭注 袁筠輯

古文尙書馬鄭注 孫星衍輯

尙書今古文注疏 孫星衍

詩書古訓 阮元

尙書校勘記 阮元

鄭注尙書大傳 陳壽祺輯

禹貢鄭注釋 焦循

尙書補疏 焦循

今文尙書經說考 陳喬樞

尙書今古文集解 劉逢祿

尙書略說 宋翔鳳

尙書舊疏考證 劉毓崧

書經詮義 汪烜

尙書緯 馬國翰輯

書傳鹽梅 黃

書古微 魏源

禹貢鄭氏略例 何秋濤

禹貢集解 丁晏

錐指正誤 丁晏

尙書餘論 丁晏

禹貢圖考正 陳澧

禹貢說 倪文蔚

禹貢班義述 成恭鏡

尙書箋 王闓運

禹貢本義 楊守敬

詩

春秋左傳

爾雅

周髀算經

國語

呂氏春秋

漢書 班固

周禮注 鄭康成

周髀算經注 趙君卿

春秋左傳注 杜預

玉篇 顧野王

禹貢讀本 陳士翹

尙書孔傳參正 王先謙

禹貢圖說 馬俊良

周禮

春秋公羊傳

孟子

逸周書

楚辭

淮南子

水經 桑欽

禮記注 鄭康成

家語 王肅

史記集解 裴駟

漢書注 顏師古

禹貢易知 李慎儒

禹貢譜 王澍 金詢

禮記

春秋穀梁傳

山海經

管子

竹書記年

史記 司馬遷

說文解字 許慎

釋名 劉熙

毛詩草木鳥獸蟲魚疏 陸璣

水經注 酈道元

通典 杜佑

元和郡縣志 李吉甫

公羊傳疏 徐彥

大徐本說文解字 徐鉉

唐書 歐陽修

通志 鄭樵

郡齋讀書志 晁公武

路史 羅泌

文獻通考 馬端臨

日知錄 顧炎武

九經誤字 顧炎武

讀史方輿紀要 顧祖禹

釋史 馬驥

五禮通考 秦蕙田

四書釋地 閻若璩

潛邱劄記 閻若璩

經義雜記 臧琳

春秋大事表 顧棟高

羣經補義 江永

經史問答 全祖望

注疏考證 齊召南

水道提綱 齊召南

癸巳類稿 俞正燮

儀禮小疏 沈彤

九經古義 惠棟

鍾山札記 盧文弨

龍城札記 盧文弨

潛研堂文集 錢大昕

讀書勝錄 孫志祖

說文解字注 段玉裁

讀書雜誌 王念孫

澆亭述古錄 錢塘

羣經識小 李惇

經讀考異 武億

羣經義證 武億

求古錄禮說 金鶚

頑石廬經說 徐養原

經義知新錄 汪中

擊經室集 阮元

經籍纂詁 阮元

警記 梁玉繩

經義述聞 王引之

左海經辨 陳壽祺

鑑止水齋集 許宗彥

秋槎雜記 劉履徇

吾亦廬稿 崔應榴

經義叢鈔 嚴杰

蜀石經考異 馮登府

十三經詁答問 馮登府

歷代地理志韻編今釋 李兆洛
說文通訓定聲 朱駿聲

讀書偶志 鄒漢勳

羣經平議 俞氏

東塾讀書記 陳澧

周禮正義 孫詒讓

漢書補注 王先謙

乾隆鞏縣志

乾隆孟縣志

嘉慶湖北通志

嘉慶施南府志

歷代地理沿革圖 六嚴

皇朝中外一統輿圖 胡林翼

三省黃河全圖 賈步緯

皇朝直省輿圖 鄒代鈞

歷代輿地沿革圖 楊守敬

河南分縣詳圖 鄒永煊

中華民國分省圖 鄒興鉅

中華民國京省道縣詳圖 鄒興鉅

右通計考據羣書共一百八十部

禹貢錐指節要 汪獻珩

禹貢圖注彙纂 鄭言紹

增訂夏書禹貢注讀 徐鹿萃

禹貢便讀 吳擘

禹貢選注讀本 吳昔巢

書經禹貢便蒙 華文楫

禹貢今注 閻寶森

禹貢注節讀 馬俊良

禹貢古今注通釋 侯楨

右備考存目九部

是書昔以爲武昌高等師範學校國文史地部之文學課本今又修改重印以爲上海持志大學羣治大學歷史地理課本之一時距武昌初印已十一年矣戊辰中秋明輝又記

禹貢注解

上海姚明輝傳述

禹貢

此尙書夏書之首篇也爲史部地理州郡諸志所昉禹平水土而史成此篇包財用而言故名貢大學云有德此有人有人此有土有土此有財有財此有用水土得禹而平即財用因禹而有也孟子美禹之功曰然後人得平土而居之又曰然後中國可得而食也得居得食爲貢之本皆禹所致故名禹貢

尙書有今古文兩本古文於西漢則有孔安國本東漢則有馬鄭本東晉則有梅賾本茲所據者梅賾本也梅賾本自唐宋以來刊本甚多歷朝石經止刊經文本版則有單注本有注疏本茲所據者阮刻注疏本也

書序云禹別九州隨山濬川任土作貢明輝案九州之制由來久矣史稱伏羲共工及帝嚳以下皆分中國爲九州惟其封域疆界未必相同名亦或異大抵境有大小而畫分爲九則歷久相沿矣至舜肇十有二州上繫十二次當禹治水時固猶九州也及水土旣平而後至禹即天子位復爲九州云堯典湯湯洪水方割蕩蕩懷山襄陵隨山濬

川治懷襄之水也水由地中行則其土能任生育而可以定貢法矣禹八年於外三過其門而不入而成此功蓋由思天下有溺者猶己溺之也

禹敷土

詩商頌長發禹敷下土方孟子當堯之時洪水橫流汨濫於天下草木暢茂禽獸繁殖五穀不登禽獸偪人獸蹄鳥跡之道交於中國堯獨憂之舉舜而敷治焉舜使益掌火益烈山澤而焚之禽獸逃匿禹疏九河淪濟潔而注諸海決汝漢排淮泗而注之江然後中國可得而食也敷土布施治水之功於土而大之言禹能大中國之土

隨山刊木

隨山循行諸山刊木斫木以通道亦以表道臯陶謨曰予乘四載隨山刊木言循行諸山而斫木爲道管子云禹身決瀆斬高橋下以爲民利此言所刊高山之木以橋下隰而利民也說文引作隨山槩木解曰槩槎識也槎衰斫也段注槎識者衰斫以爲表識也明輝案釋下文奠字似隨山刊木爲禹測量之法高山大川蓋以隨山刊木之法測定之耳詳下文九山刊旅句

奠高山大川

高山大川五嶽四瀆之屬山川既定可以禮祀之呂刑禹平水土主名山川爾雅從釋地以下至九河皆禹所名也禹名山川亦奠之一端

冀州

唐虞帝都所在

既載壺口治梁及岐

既載漢儒屬冀州爲句宋儒連下壺口讀胡氏從之載之言事壺口山名在今山西吉縣西七十里山當河流之衝河出其上故成洪水禹治水始鑿通之禹既有事於此遂西治梁岐梁山在今陝西韓城縣南十九里岐山在今陝西岐山縣東北十里孟子曰當堯之時水逆行氾濫於中國益稷篇禹曰洪水滔天浩浩懷山襄陵此可見水爲山阻逆行氾濫故治之道在疏通之而壺口所以始事也梁岐皆雍州山而此急先務者后稷教民稼穡在梁岐之間庶民粒食爲急務也梁岐一帶在渭洛上游地較高水患稍紓能樹藝耳

既修太原至于岳陽

修修繇之功高平曰原原大故曰太原今山西陽曲縣一帶高平之地是也岳太岳今

山西霍縣東南霍山是也山南曰陽岳陽今山西安澤趙城二縣至南河一帶之地太原汾水所出岳陽汾水所經

覃懷底績至于衡漳

覃懷河北地今河南武陟沁陽一帶底績致功也漳水在覃懷之北東流故曰衡漳衡橫也詳後導河降水下

厥土惟白壤

白土之色壤土之質無塊曰壤蓋輦土也

厥賦惟上上錯

民納穀於官曰賦上上第一等錯雜第二

厥田惟中中

田之高下肥瘠九州中爲第五

恆衛既從大陸既作

恆水名今玉帶河上游滌水是也衛亦水名今爲滹沱河大陸澤名今直隸任縣東北有大陸澤從相從而入河也作耕作大陸附近地卑禹功未施時恆衛不從而瀾漫其

中田成巨浸至恒衛既從于河又治大陸使其地可耕作也禹河與今河道不同詳後
兗州及導河

島夷皮服夾右碣石入于河

碣石山名今淪入海矣詳後導山島唐以前本作鳥孔傳讀爲島海島之夷獻其皮服
由河而達帝都今遼瀋以北地寒故其民御皮之日多瀋陽長春龍江諸城皮貨市極
盛島夷之遠者當在冰洋其貢物會於遼瀋而後下遼水以渡海夾挾也夾右碣石言
其海道在碣石之左始則南航繼則西航挾碣石以俱行如今航海者藉山石爲標識
也

濟河惟兗州

濟本字爲沛濟借用字兗州在濟河二水之間東南據濟西北距河禹濟在今山東定
陶縣境由此東北流至東平縣東平以東今爲黃河道由今黃河道過濟南城東流至
桓台縣由今小清河道入海兗以此與徐青二州分界禹河在今河南汲縣由此東北
流經濬湯陰安陽臨漳四縣又經直隸成安肥鄉曲周平鄉廣宗鉅鹿南宮新河冀衡
水武邑武強阜城交河獻滄青靜海天津東入于海兗以此與冀分界若夫定陶汲縣

間爲兗豫之界也

九河既道

爾雅九河徒駭太史馬頰覆釜胡蘇簡絜鈞盤鬲津徒駭最北在今直隸交河縣境漢成帝時有其道鬲津最南今山東德縣漢時有故道胡蘇故道漢時在直隸東光縣餘皆不可考河自大陸以下禹疏爲九道以殺其勢又爾雅九河自北順次而南今山東有馬頰徒駭二河冒名非禹河也九河之壞自齊桓桓塞八流以自廣不數十載至周定王五年而河徙矣

雷夏既澤澗沮會同

雷夏澤名在今山東定陶縣北境澗沮二水今湮舊在澤西北相會而同入于澤
桑土既蠶是降丘宅土

今山東濮縣古濮上其地尤宜蠶桑丘土之高者水去則人得平土而居故降丘宅於土

厥土黑墳厥草惟繇厥木惟條

黑墳色黑而墳起一說墳土有膏肥者繇抽也條長也水土平則草抽木長矣

厥田惟中下厥賦貞作十有三載乃同

田第六貞正也賦下下第九以此爲正待民耕作十三年地力厚乃同他州亦視豐凶以爲多寡下云九州攸同克其最後歟鄭君連讀貞作解曰此州正作不休又曰十三年乃有賦與八州同是鄭意此州初無賦也

厥貢漆絲厥篚織文

地宜漆林又宜桑蠶故貢漆絲織文織而有文者也盛之筐篚而貢

浮于濟漯達于河

此由兗通冀之道也漯水禹治河所引枝流也禹河在今河南濬縣境東北流而別分一枝東流爲漯漯由今滑濮陽觀城范朝城莘堂邑聊城清平博平禹城臨邑商河惠民濱蒲台利津諸縣入海禹時濟漯相通其通處在漢時名四瀆津今地約在山東桂平縣之東濟通漯漯通河爲兗州貢道漯本字爲濕說文濕爲沛濕之濕溼爲燥溼之溼隸變濕爲漯而燥溼燥濕混用矣

海岱惟青州

海今渤海北黃海及日本海岱泰山

嵎夷既略

嵎夷地名今遼東朝鮮之地是也畧經略也堯典分命羲仲宅嵎夷曰暘谷淮南子天文訓日出於暘谷浴於咸池拂於扶桑是謂晨明今以里差推之扶桑即檀香山咸池即太平洋暘谷當在美洲則今美洲地亦嵎夷境遠略所可及也

濰淄其道

濰淄二水道今如故

厥土白墳海濱廣斥

斥地鹹鹵可煮鹽者也充青徐揚皆濱海獨青著斥者疑當時惟青州海濱之民能煮鹽古夙沙氏煮海爲鹽夙沙肅慎之祖今遼東也海濱包舉東北諸海言故廣

厥田惟上下厥賦中上

田第三賦第四

厥貢鹽絺海物惟錯

絺細葛海物種類雜故錯今日本國千島一帶爲天下三大漁海之一海產物種類甚多

岱畎絲枲鉉松怪石

畎谷也岱谷出此五物皆貢之枲牡麻也鉉或作鉛怪石疑即今所謂化石者孔子曰木石之怪夔罔闕是歟

萊夷作牧

萊夷萊山之夷今山東膠東道東境是其地作耕作牧放牧

厥篚檿絲

檿桑山桑柘屬也檿絲蠶食檿桑所得絲也今日檿蠶絲又譌稱野蠶絲其織曰繭紵最堅韌故其絲中琴瑟弦

浮于汶達于濟

禹時汶水由今甯陽至東平縣境入濟胡氏渭曰汶徐水其導源處猶爲青城故青之貢道書浮于汶又曰今蒙兗之文曰達于濟則由潔以入河可知矣其東北境逕浮濟不必從汶

海岱及淮惟徐州

岱界青淮界揚爲徐之南北兩界若其西境以濟界兗而濟淮之間與豫接界禹淮自

今安徽懷遠縣至江蘇淮陰縣與今淮同淮陰以下歷淮安漣水阜甯入海今爲淤黃河道此禹時徐揚界上之淮也

淮沂其乂

乂治也禹沂在今邳縣南界入禹泗詳後

蒙羽其藝

蒙羽二山名蒙山在今山東蒙陰縣南羽山在今江蘇贛榆縣西藝種藝也言蒙羽之間皆可種藝今言中國水利者莫不重導淮導淮之術要在擇海口擇海口惟淤黃河與鹽河兩道耳夫鹽河口卽沭沂下游既可爲淮河尾閘則其關係於中國之水利巨矣蒙羽沭沂上游蒙羽治則沭沂治沭沂治則淮治禹重蒙羽殆逆知後世淮河尾閘繫全國水利之重輕也神已

大野既豬

豬都之段借字豬都皆從者得聲聲同則義相通也穀梁僖十六年傳民所聚曰都管子水地篇卑也者水以爲都居都居正合豬義既豬水已聚也大野澤名漢書地理志山陽郡鉅野大野澤在北水經濟水注何承天曰鉅野湖澤廣大南通洙泗北連清濟

舊縣故城正在澤中元和郡縣志大野澤在鉅野縣東五里南北三百里東西百餘里
明輝案今山東鉅野縣一帶無此大澤如漢志水經諸書所載此澤當在今鉅野鄆城
嘉祥汶上魚臺金鄉及豐沛一帶疑其遺跡爲獨山微山諸湖近王氏謂洪澤及高郵
寶應諸湖亦在大野既都之列揆諸江淮水利素重隄閘以資蓄洩正合都義王說可
通也

東原底平

東原自鄭君以來諸說皆以今山東東平縣當之獨王氏謂宜在淮泗沐旁似通底平
致功而平言可耕作大野上游東原下游東原之平由於大野之豬耳

厥土赤埴墳草木漸包

埴黏土也漸進長包叢生

厥田惟上中厥賦中中

田第二賦第五

厥貢惟土五色

王者封五色土爲社建諸侯則各割其方色土與之使立社

羽狀夏翟

羽山之谷貢夏翟之羽夏翟雉名羽中旒旄夏五色具也

嶧陽孤桐

嶧山在今江蘇邳縣西南境山陽生孤峭之桐中琴瑟

泗濱浮磬

泗水涯水中見石可以爲磬故曰浮磬今江蘇銅山縣東南六十里 梁爲禹貢浮磬

處明嘉靖時鑿平矣

淮夷蠙珠暨魚

淮夷淮水之夷蠙珠名淮水之上夷民獻此蠙珠與魚

厥篚玄纁綺

玄黑而有赤色者纁紬也綺絹也

浮于淮泗達于河

說文水經注引此河皆作荷許君曰荷澤水在山陽湖陵从水苛聲大徐古俄切水經有荷水分於濟入於泗明輝案先儒多以說文爲正胡氏渭據水經考之知禹泗由今

山東泗水縣發源至濟甯縣經魚臺滕沛銅山通淮今自銅山以上至濟寧已無其迹
銅山以下卽淤黃河道又禹時有蒹澤在今山東定陶縣東北境澤水由定陶東流經
鉅野金鄉至魚臺通泗此卽由泗達蒹之道而蒹澤又通於濟故達蒹則可浮濟源達
河矣

淮海惟揚州

淮與徐豫爲界海在東南無際

彭蠡既豬陽鳥攸居

彭蠡澤名今鄱陽湖也陽鳥鴻雁之屬隨陽氣南北彭蠡既豬則水陸分明而陽鳥至
此有所居矣今鄱陽湖中曆七八月間水勢汪洋入冬水落正月則涸春盡復漸漲彭
蠡按時漲落陽鳥亦候氣往來繹經意似彭蠡水利以陽鳥至時適有所居爲宜

三江旣入震澤底定

三江爲漢以來諸儒說禹貢者所聚訟今從胡氏定爲江漢彭蠡旣會後所稱詳後導
江入入海也震澤今太湖澤低陷而周圍之地皆高其水底往往有煤或古時以震陷
得名底定則不震矣

篠簜既敷厥草惟天厥木惟喬厥土惟塗泥

篠竹箭簜大竹敷布生天長也喬高也塗泥地沮洳溼也

厥田惟下下厥賦上下錯

他本錯上皆有兩上字惟宋十行本僅一上字阮刻據之故亦少一上字阮校勘記定爲脫文云當補入然漢書地理志亦作賦下上錯僅一上字也孔傳賦第七雜出第六是梅賾本確有兩上字漢書師古注賦第七又雜出諸品則班志所據禹貢又確爲一上字

厥貢惟金三品

三品金銀銅也今金富於澳大利亞及南非洲

瑤琨篠簜齒革羽毛惟木

瑤琨美石次玉者齒象牙革犀皮羽毛旄牛尾木榿梓豫章今象牙出安南印度犀皮出非洲

島夷卉服

卉草也南洋熱地故草服 家大人曰卉服有冬夏二種舊說指木棉即古貝草其精

好者謂之吉貝元人得吉貝衣稱爲奇寶此冬服也臺灣葛內地所珍盡人能知印度有蕉布爲出口大宗廣被於南洋而中土罕睹惟左思吳都賦嘗及之曰蕉葛升越弱於羅紈是暑服非一矣明暉案此與冀州島夷獻皮服同

厥篚織貝

傳曰織細紵貝水物鄭曰貝錦名詩云萋兮斐兮成是貝錦明暉案貝疑是吉貝織貝或即棉布

厥包橘柚錫貢

厥包橘柚當句小曰橘大曰柚柚俗稱文旦今如永嘉之柑南豐之橘新會之橙沙田之柚產地皆禹貢揚州域包包裹橘柚易敗包裹是遠輸防腐之法錫貢錫命乃貢言不常

浚于江海達於淮泗

浚即沿沿正字浚隸變釋文出浚云鄭本作松松當爲浚馬本作均云均平明暉案松均皆不如浚字爲順順流而下曰浚浚江入海自海入淮自淮入泗胡氏渭曰經叙東南四州之貢道首尾相銜層層脫卸化工也非畫筆也

荆及衡陽惟荊州

山南曰陽荊州界自荊山南至衡山之南荊山在今湖北南漳縣其脈西接巴山爲江漢之分水嶺

江漢朝宗於海

孔曰二水經此州而入海有似於朝百川以海爲宗宗尊也鄭云江水漢水其流湓疾又合爲一共赴海也猶諸侯之同心尊天子而朝事之

九江孔殷

九江亦爲漢以來諸儒所聚訟胡氏據山海經水經知即洞庭湖孔殷言其吞吐壯盛浩無津涯之勢甚盛也

沱潛旣道

爾雅釋水云水自江出爲沱漢爲潛

雲土夢作乂

雲土夢三字漢書作雲夢土雲夢方八九百里今兩湖之間卑下地皆是也夏秋潦集皆澤霜降水涸爲藪有湖有土而江沱潛漢灌注其間洪水時固一大澤也而中有平

土高丘水去則可以耕作矣又治也治其田疇今江漢附近諸湖居民築堤與水爭土湖漸縮田田漸多經所謂土作又者亦如是耳

厥土惟塗泥厥田惟下中厥賦上下

田第八賦第三人功修

厥貢羽毛齒革惟金三品

此雖與揚州同然揚州由海道荊州係陸道象齒犀皮之屬當與揚州所貢同取於安南等地蓋所產同方而由二州進貢耳

椀榦括柏礪砥磬丹

椀榦木榦柘也一說凡木材中弓弩之榦者括白色柏葉松身一曰即檜礪磨刀石也砥其精者磐石中矢鏃丹硃砂今湘黔間最多

惟箇露楛

箇露美竹中箭筈楛木類中矢幹

三邦底貢厥名

三邦不可考凡椀榦及楛十物第使致貢其名與揚州錫貢意相似一說箇露楛爲三

物三邦所貢其名天下稱善今湖南湘陰縣城外蘆陵潭湖北漢陽縣城外鸚鵡洲皆爲竹木大市其材由湘沅上游浮江而下又荆山之西樹木深翳互千數百里嚮稱老林凡此諸地或即經所云三邦者歟

包匭菁茅

孔傳截包一字爲句匭菁茅又一句正義云鄭立以厥名下屬包匭菁茅二家句讀旣異而裴駟讀史記夏本紀顏師古讀漢書地理志皆以包匭菁茅爲句又與孔鄭不同蔡傳如裴顏讀今從之菁茅茅有毛刺者給宗廟縮酒欲其香色不變故包裹之而加以匭匭匣也

厥篚玄纁璣組

玄赤黑色纁黃赤色此州染玄纁善故貢之璣珠不圓者此州產璣善爲組故貫璣於組以獻

九江納錫大龜

龜千歲滿尺二寸曰大龜出於九江水中爲前知神物王者有大疑則稽之不可常得故不可錫命使貢有則如天錫而納於上

浮於江沱潛漢逾於洛至於南河

周禮職方洛雍州浸其豫州川有雒說文亦以洛爲雍州川入渭則此逾於洛之洛古或作雒潛字下唐以前本或衍一于字逾越也漢不通洛故遵陸逾山而入於洛入洛則可至南河達帝都矣南河冀豫界上之河也在帝都南故曰南河

荆河惟豫州

豫州界自荆山而北至於河河北爲冀州豫州東界兗徐揚三州西界梁雍二州處九州之中

伊洛灑澗旣入於河

四水合流而入河洛爲大伊次之其水患伊爲甚

滎波旣豬

滎澤名濟水之源伏流溢出者詳後導水波水涌流也此與江漢朝宗皆傳神之筆

導蒍澤被孟豬

蒍澤見前徐州貢道漢志有蒍澤乃蒍澤之誤至今山東蒍澤縣或譌作蒍澤縣滎澤伏流復出至此導而爲濟瀆孟豬亦澤名在今河南虞城縣西北地被者因蒍澤之水

盛時衍溢使被及孟豬不常入也自河決徙流孟豬故迹不可考矣周禮有望諸左傳爾雅有孟諸即此孟豬也史記水經又作明都漢書又作盟豬皆因聲音同而互相通假

厥土惟壤下土墳壚

高者壤下者墳壚墟疏也一說墟黑剛土也

厥田惟中上厥賦錯上中

田第四賦第二又雜出第一

厥貢漆臬絺紵

說文紵繅屬繅臬屬

厥篚織纊

纊絲絮也

錫貢磬錯

錯治玉石也錫貢與揚州橘柚同義

浮于洛達于河

唐石經作浮于洛河

華陽黑水惟梁州

華陽華山之陽黑水今金沙江瀾滄江潞江皆是

岷嶓旣藝

岷山江源所出嶓嶓冢山漢源所出

沱潛旣道

此梁州之沱即今四川灌縣至瀘縣之沱江也潛今爲嘉陵江廣元縣北朝天關以上神官驛附近有水流石穴中東北由陝西寧羌縣通漢水源西南入嘉陵江由此至重

慶皆禹貢梁州之潛也

蔡蒙旅平

蔡蒙二山名蒙山舊說在今四川雅安縣南蔡山無考今西康昌都舊稱察木多爲藏之東境疑即此蔡也蒙當在雲南大理一帶唐初蒙詔蓋因以爲氏祭山曰旅平言治

功畢

和夷底績

和夷西南夷名今川藏滇緬番人皆是底績致功可治

厥土壽黎

黎小疏也

厥田惟下上厥賦下中三錯

傳曰田第七賦第八雜出第七第九三等鄭曰三錯者此州之地有當出下之賦者少耳又有當出下上中下者差復益少

厥貢璆鐵銀鏤磬

傳曰璆玉名又史記集解引鄭曰黃金之美者謂之鏤是鄭本璆作鏤鏤剛鐵可以刻鏤磬又名鐵石火煉成鐵極剛利今大金沙江小金沙江之沙金及野人山中瓜子金等其鏤也歟

熊羆狐狸織皮西傾因桓是來

四獸之毛可以織爲罽其皮爲裘西傾山之戎以其織與皮因桓水來梁梁則以之入貢桓水今白水江出甘肅四川界上與岷江源相近由甘肅流入四川至昭化縣與西漢水會爲嘉陵江嘉陵江即梁州之潛也鄭君讀熊羆狐狸連上厥貢句織皮屬下讀

謂爲西戎之國又謂桓是爲隴阪名

浮于潛逾于沔入于渭亂于河

潛今嘉陵江沔漢水上源也潛自朝天關以上不通舟故逾山而達于沔其自沔入渭之道當在褒斜二水褒水於陝西褒城縣通沔斜水於郿縣通渭二水源相近據水經注有溪水相灌通此由沔入渭之道也爾雅釋水正絕流曰亂言橫渡也

黑水西河惟雍州

黑水今金沙江瀾滄江潞江源西河今山西陝西界上之河因在帝都西故曰西河河西雍州河東冀州

弱水既西

說文水部溺水自張掖刪丹西至酒泉合黎餘波入於流沙桑欽所說大徐音而灼切明輝案說文別有伏字訓沒也則此弱水漢人當作溺水然考水經不載此水今甘肅山丹縣有水西流出塞即此

涇屬渭汭

屬入也汭水相會處又水北曰汭

漆沮既從

漆沮之水今北洛也故入于渭明初改流而東逕趨于河

澧水攸同

澧水在今陝西鄠縣東即長安縣之西同同於渭也

荆岐既旅終南惇物至于鳥鼠

荆山與荊州荆山同名此在陝西朝邑縣西南岐山在岐山縣東北終南山在藍屋縣

南惇物山在郿縣南鳥鼠山在甘肅渭源縣西

原隰底績至于豬野

爾雅廣平曰原下溼曰隰鄭注原隰幽地胡氏謂秦中之原獨多地勢高下相因有原則必有隰其卑於原者即隰也所該甚廣不專在幽地蓋經叙涇漆沮澧皆由渭入河爲決川距海之事又叙荆岐終南惇物鳥鼠五山主谿谷而言至此原隰則主田野而言皆濬吠滄距川之事豬野據班志即漢之休屠澤說者以今甘肅鎮番縣白亭海當之明輝謂寧夏邊外西套蒙古阿拉善額魯特額濟納土爾扈特之地廣袤皆八九百里有白河黑河郭河及水磨川等所瀦之居延澤昌寧湖魚海皆在白亭海西北如此

廣野爲河西諸水所都惟豬野二字足以形容其狀非一白亭海所能盡也傳云豬野地名鄭云致功西至豬野之澤二說本無語病後人因班志而必舉一海子以實之隘矣

三危既宅三苗丕叙

舜典竄三苗于三危三危山名河圖括地象云在鳥鼠之西與汶山相連黑水出其南水經注引山海經亦云三危之山在鳥鼠之西又云三危在燉煌南與岷山相接山南帶黑水據此推之爲今巴薩通拉木山鄭注謂三危在積石之西南甚當然自巴薩通拉木山東南所衍諸山皆當屬三危詳後導川黑水下宅可居也不叙言大有次叙其族安定矣

厥土惟黃壤厥田惟上上厥賦中下

土色黃其質無塊田第一賦第六胡氏曰九州田賦之高下先儒皆云以人功修不修今案田美而少則賦亦不甚多田惡而多則賦亦不甚少不盡繫乎人功之修否也

厥貢惟球琳琅玕

爾雅釋地西北之美者有崑崙虛之球琳琅玕焉球琳皆玉名琅玕石而似珠

浮于積石至于龍門西河會于渭汭

積石山在今青海境龍門山在今陝西韓城縣東北由積石沿河順流而北千里而東千里而南與七州相會于渭汭若本州東南境則浮渭至此亦相會貢道結束於此一會字了之神筆也

織皮崑崙析支渠搜西戎即叙

崑崙今新疆省南境析支今青海境渠搜今蔥嶺西皆西戎名貢織皮即叙就而叙之傳云織皮毛布今自西藏而西遠至歐洲皆衣織毛正合傳說胡氏渭曰輕改經文此學者之大患然古經實有脫誤不可曲爲附會如此十二字是也不必遠證第參以梁州之文則此爲錯簡明甚其曰織皮即熊羆狐狸織皮也但文有詳略耳曰崑崙析支渠搜猶西傾也但國有多少耳曰西戎即叙猶言因桓是來也但辭有同異耳八州之貢物未有列於貢道之後者則此十二字當在厥貢球琳琅玕之下

導嶻及岐至于荆山逾于河

自此起爲導山文就山之首尾脈絡而叙其條列蓋禹隨山所奠也顏師古曰自此以下更說所治山水首尾之次孔穎達曰上文每州說其治水登山今更條說所治之山

水二氏皆本孔傳深得導字精義岍山在今陝西隴縣西四十里岐山在岐山縣東北十里荆山在朝邑縣西南曰及曰至于言其脈絡相連也河西河逾河爲雷首顧氏祖禹曰孟門山在壺口北即龍門之上口南至龍門山謂之下口其地兩峰壁立夾河並峙河經其中扼束而出南北蓋百餘里明輝案此即逾河處矣

壺口雷首至于太岳

壺口舊屬雷首讀明輝以爲屬逾于河讀便壺口在今山西吉縣黃河岸其上孟門其下龍門皆爲山脈逾河處也雷首山在永濟縣蒲州城東南三十里其東接中條山然雷首亦名中條中條首起蒲州尾接太行跨芮城平陸安邑聞喜諸縣境太岳今霍山在霍縣東南三十里經云雷首至于太岳已包舉中條矣

底柱析城至于王屋

底柱山峙黃河中在今河南陝縣東四十里山西平陸縣東南五十里析城山在山西陽城縣西南七十里王屋山在河南濟源縣西八十里山西垣曲縣東北百里

太行恆山至于碣石入于海

大讀爲太行戶剛反又如字太行山起于河南沁陽縣北迤山西與河南直隸之界上

其西至榆次壽陽諸縣山皆有太行之名今長治沁遼至于平孟皆在其脊河圖括地象曰太行天下之脊言其長也恒山北岳在今直隸曲陽縣西北山西渾源縣東南山西之繁峙廣靈靈邱三縣直隸之阜平廣昌唐完易蔚六縣皆在其麓由此回環至京都之北引而東直抵海岸或以爲亦太行之脈經言恒山至于碣石則已包舉無遺矣碣石山漢時在今直隸昌黎縣東南方海中彼時尚在海旁陸上其後淪入海中今無迹可尋矣此言入于海殆禹時海中已伏有碣石餘脈歟抑禹知碣石之必淪於海也或以昌黎碣石爲左碣石而謂旅順老鐵山爲右碣石則更包舉奉天之千山摩天嶺而所云入于海者爲隍城諸島矣

西傾朱圉鳥鼠至于太華

此導山第二脈也西傾山在今甘肅臨潭縣西南邊外青海境朱圉山在今甘肅伏羌縣西南三十里鳥鼠山在今渭源縣西二十里胡氏渭以鳥鼠在朱圉西疑古經元作鳥鼠朱圉自秦禁學口說流行顛倒其字云太華西岳在今陝西華陰縣南十里雍州終南惇物至于鳥鼠惇物在朱圉東終南在太華西此云朱圉至于太華已包舉之矣熊耳外方桐柏至于陪尾

熊耳山在今河南盧氏縣西南五十里外方山即中岳嵩山在今登封縣北十里桐柏山在今桐柏縣東一里陪尾山孔云淮所經鄭云在安陸東北今湖北安陸縣東北五十里有橫尾山是也或謂今山東泗水縣泗水源陪尾山即此若定爲泗水之陪尾則其脈自桐柏而東過武勝關入安徽省至霍山縣爲霍山東東北迤在合肥縣有大灋山定遠縣有大橫山鳳陽縣有石門山盱眙縣有浮山江蘇邳縣有嶧山皆藕斷絲連益北入山東爲嶧縣費縣滕縣諸山至于泗水縣東南五十里之陪尾山

導嶧冢至于荆山

此導山第三脈也嶧冢山在今陝西甯羌縣北九十里荆山在今湖北宜漳縣西北八十里由嶧冢至荆山中經巴山

內方至于大別

內方山在今湖北荊門縣東南百八十里大別山傳云在荊州爲漢所經班云在六安國安豐縣鄭云在廬江安豐縣漢安豐縣今安徽霍山縣地非漢水所經故左傳杜預注疑班鄭二說不合至宋儒本元和郡縣志指魯山爲大別山胡氏禹貢錐指亦主此說明輝案魯山在今湖北漢陽縣東北百步東臨大江漢口在其北人皆呼之曰龜山

予目驗之酷似龜形頭入江水爲吸水狀因疑大別之別或與鼈通聲同固得通用夫山水土名傳自往古字有改易語無變遷爲龜爲別文言之異耳

岷山之陽至于衡山

此導山第四脈也岷山之陽包今四川松潘理番懋功雅安峨邊諸縣凡川西高地皆在其內即滇黔之境亦在其中至于衡山中經武陵衡山南岳在今湖南衡山縣西北三十里

過九江至于敷淺原

九江見前荊州敷淺原爲鄱陽湖西地明輝案自導岷至此班固以兩荆山分南條北條馬融王肅皆爲三條三條者導岷北條西傾中條嶓冢南條鄭康成則爲四列導岷爲陰列西傾爲次陰列嶓冢爲次陽列岷山爲正陽列唐僧一行言山河兩戒積石終南太華雷首恒山以至朝鮮爲北戒岷山嶓冢太華熊耳桐柏荆山衡山以至閩越爲南戒蔡傳以導岷爲北條大河北境之山西傾爲北條大河南境之山嶓冢爲南條江漢北境之山岷山爲南條江漢南境之山元吳澄更以蔡傳四列各分爲二導岷至逾于河爲一節壺口至入于海爲一節西傾至至于太華爲一節熊耳至至于陪尾爲一

節導嶓冢至于荆山爲一節內方至于大別爲一節岷山之陽至于衡山爲一節過九江至于敷淺原爲一節予意鄭爲近是其陰列與陽列乃地形高下之所判而次陰次陽則山脈在河漢江淮之間其爲分水嶺甚明也胡氏曰山有見於九州之下而導山無之者有見於導水之下而導山無之者有見於導山之下而他無所見者有再見者有三見者或有或無或單或複皆有至理存焉學者不可以不察

導弱水至于合黎

自此起爲導水文鄭曰凡言導者發源於上未成流凡言自者亦發源於上未成流釋文出弱字云本或作溺據齊氏水道提綱山丹水即弱水按水在今甘肅山丹縣境其下流近圖稱爲黑河至金塔縣有白河來合北流於塞外入居延澤合黎山據胡文忠圖在今金塔縣東

餘波入于流沙

流沙今甘肅玉門安西以北敦煌以西沙漠是也其地風與沙俱滾而水與沙俱流沙去成田沙至爲漠因風而流故曰流沙今弱水北入居延海經云餘波入流沙當是西行者今不知其道若求遺跡惟安西布隆吉河可以當之或禹時居延海以西沙中尙

有水道日久漸涸理亦有之然布隆吉河所匯哈拉淖爾正合經文餘波之神波如榮波之波言餘則非止一波言水涌流於沙與沙俱流而沒經文六字傳神如繪

導黑水至于三危入于南海

楚辭天問黑水玄趾三危安在是黑水三危之所在屈原已不能知自漢以後紛紛聚訟皆不能指實其地惟漢志載滇池有黑水祠一語前人罕至塞外故胡渭王鳴盛諸氏說此莫不闕疑昔家君由緬入滇身歷其境考查既確著有黑水解曰黑水非一水之名也今中國南流之水多黑其逕達于南海者爲瀾滄江潞江大金沙江其由大金沙江入南海者爲龍江檳榔江要之皆黑水也大理府志以瀾滄江當禹貢之黑水蓋本諸元史明人李元陽先已言之楊慎嘗主其說騰越州志又以大金沙江爲黑水則用明人黃貞元之說張機作南金沙江考亦主之蓋李元陽太和人也黃貞元騰越人也各尊其境內之水其言皆非無據自聖祖御製有山川考諭羣言於馮折衷蓋以潞江上流有喀喇烏蘇之名蕃語謂黑爲喀喇水爲烏蘇尤顯然可證也一統志及衛藏圖志諸書遵之允發古人所未發惟詳繹聖祖之諭亦未嘗辨瀾滄金沙爲非大哉王言所包者廣後儒如闕禎兆史秉信阮元諸人或引申黃貞元之說或引申李元陽

之說各執一偏殆聖門盡各之義歟本朝欽定七經有存異一門以此類推則亦不妨兼存其說矣文棟竊以爲禹貢治水不當專治一水而遺其餘瀾潞金沙皆發源西藏而南流亘古雍梁兩州之域自騰越永昌以北縱橫數百里間世所稱爲怒夷山及赤髮野人陸阻地者其間萬山蟠結束羣江之腰聚於一處爲南北一大關鍵相傳其峭壁不可梯繩弱水不任舟筏蓋天地之奧區人力所未通也意者其卽古之三危歟三危猶云諸危也過此以往羣江分流浩漫而入於南海矣是故諸家之說要當合而一之益以闡明聖祖言外之意而於禹貢治水之義或亦庶有當乎

導河積石至于龍門

爾雅釋水曰河出崑崙虛山海經曰崑崙之丘河水出焉又曰崑崙之墟方八百里高萬仞河水出東北隅以行其北水經曰崑崙墟在西北去嵩高五萬里地之中也河水出其東北陬明輝案據此知河源在葱嶺今塔里木河是也山海經又言積石之山下有石門河水冒以西南流水經又言河水出蒲昌海今羅布淖爾外南至積石山下有石門河水冒以西南流史記亦言鹽澤卽羅布淖爾潛行地下其南則河源出焉漢書言蒲昌海一名鹽澤其水停居皆目爲潛行地下南出於積石爲中國河明輝案據此知

積石爲重出之源也禹導河自積石始而不溯初源蓋潛行者不可見故聖人闕之龍門在壺口南在今山西河津縣西北陝西韓城縣東北夾河爲險昔龍門未關河出其上禹鑿通之

南至于華陰

南字逗華陰華山之北爾雅河百里一小曲千里一曲一直河自龍門至此而大曲自此以上由北南流所謂西河也

東至于底柱

東字逗底柱山名河水分流包山而過山見水中若柱然禹所鑿也唐趙冬曦言底柱山有六峯皆生河之中流其最北兩柱相對所謂三門也次於其南有孤峯揭起夏禹之廟在焉復次其南有三峯河水從黃老神前東流湍激觸於蝦石折流而南湫於三門苞於廟山乃分爲四流淙於三峯之下抵於曲隈會流東注自此以下巍峯夾岸凡百二十里亦禹所鑿其山雖關尙有湍流激石水勢迅急爲一十九灘

又東至于孟津

又東逗孟津孟地之津渡處在今河南之孟縣南孟津縣東北

東過洛汭至于大伾

洛汭洛入河處今洛口大伾山名在今河南濬縣東南二里禹河由今武陟之東行獲嘉原武之間經陽武延津之北新鄉汲縣之南至濬縣東南滑縣東北其北岸有大伾山禹河在山南分枝東流爲漯其本枝則向北流漯詳兗州貢道自華陰至此古謂之南河

北過降水至于大陸

降水即冀州衡漳今爲濁漳源出山西屯留長子縣境降水在今河南臨漳縣城西南向北流由今直隸成安肥鄉縣境至曲周縣東南入禹河禹河自今河南濬縣大伾山北流經內黃湯陰安陽臨漳境又經今直隸大名成安肥鄉境至曲周縣東南會降水此所謂北過降水者也河又北流至鉅鹿縣即今大陸澤之東顧氏祖禹言河自大伾以北地勢廣衍大陸則鍾水之區也蓋禹河之有此澤猶今長江有洞庭鄱陽耳胡氏渭言曲周以下本降水之所行禹穿地引河合之入海是謂北過降水耳

又北播爲九河

播分也河至此注沮洳之鄉故分散以殺其溢九河名及其道詳見兗州其最北徒駭

爲正枝由鉅鹿向冀縣深縣獻縣青縣一帶至天津爲逆河禹河自大伾以下古謂之東河

同爲逆河入于海

傳曰同合爲一大河名逆河鄭曰逆河言相向迎受唐人說逆迎也海口有朝夕潮以迎河水其入海處當在今直隸昌黎縣南方海中禹時碣石在其口外蓋今渤海禹時尙多陸地逆河由大沽口外東行至碣石西南而入海耳其後陸陷爲海逆河下游與碣石俱淪矣漢書溝洫志載大司空掾王橫言往者天嘗連雨東北風海水溢西南出濶數百里九河之地已爲海所漸夫九河之地旣爲海所漸則逆河之地爲海所淪矣抑明輝謂王橫之言最能形容逆字海水之溢西南而漸河殆自禹時已然則此逆字亦傳神之筆也

嶓冢導漾東流爲漢

孔傳云泉始出山爲漾水東南流爲沔水至漢中東流爲漢水

又東爲滄浪之水

水經注漢水至武當縣西北四十里水中有洲名滄浪洲案魏武當縣今湖北均縣也

過三澁至于大別南入于江

三澁諸家說皆不安明輝案說文云澁埤增水邊土人所止者又引此文云夏書曰過三澁今漢水至襄陽其南岸有古大隄緣水流至此漸猛衝決爲患故爲隄防以資捍禦湖北通志言自商周已然然據說文知澁字即後世隄防之類則襄陽古隄當自虞夏已然不止商周也漢自襄陽以下流經宜城鍾祥荊門京山潛江天門沔陽漢川八縣至漢陽夏口二縣間入江據湖北通志其左岸自鍾祥之石城以下迄漢川縣境有紅廟隄一道右岸自荊門之內方山以下迄潛江縣境有沙洋隄一道兩隄捍禦水流居民倚爲保障與襄陽古隄適符三澁之數當共爲禹時所創作又漢水下游諸縣有所謂皖者係居民築泥爲城牆而止其中蓋因地勢低窪用以防水亦符說文埤增水邊土人所止之義今諸縣界中皖無慮數百三澁疑又可作衆澁解三者衆也言皖甚衆也天門縣志言縣治低窪爲禹貢三澁故地當是故老相傳有此說然三澁可包天門天門不可限三澁夫三澁與雲夢土作又互爲注解則易通雲夢成土由於澁之衆多人埤增水邊土止其中乃可使雲夢水去土見而作又此在禹貢筆法互見之例也漢水入江之口古今屢有變遷元明時在今漢口下游入江今則在漢口上游大別山

下游顧氏棟高曰春秋時大別山在漢水東岸今在漢水西岸

東滙澤爲彭蠡東爲北江入于海

彭蠡澤今鄱陽湖滙迴也漢水旣入江槽東至鄱陽湖口贛中諸川之水爲江漢所遏乃相與迴旋而爲湖此夏秋兩季則然及至冬令彭蠡之水亦入江槽矣蓋江漢水漲於暮春夏秋益肥入冬則瘠又漢水之漲先於江故彭蠡始滙時漢水力也北江與中江對舉詳後中江

岷山導江東別爲沱

江在今四川灌縣分枝向東別出爲沱

又東至于澧過九江至于東陵

江由今湖北江陵縣行虎渡河之道東南至澧水又過今洞庭湖至巴陵胡氏渭言禹導江至澧過九江至東陵其故道如此蓋指巴陵爲東陵也

東池北會于滙

池表行也東池是矣北字未明疑是北江也與北江之水會于滙即江漢與鄱陽之水相滙也予於漢口驗之漢水先漲江水後漲春夏之交江漢水勢相敵若使無漢江水

不至滙彭蠡漢水既漲江槽不容乃其水不得不倒滙於彭蠡故彭蠡之初漲雖漲於贛鄱諸江亦漲於漢也此即漢之東滙澤爲彭蠡也至江水初漲時因九江孔殷尙能容蓄故東陵以下不見其漲及至夏秋江水盛漲乃與北江共會于滙耳又予往來吳楚驗得石鐘山下游江槽之水入夏則黃水之中襟有青水相與迴旋如是者迤數十里蓋湖水青而江漢之水黃夏秋三水皆盛相迴於此所謂滙也予既目驗于漢口與湖口而湘贛門人亦爲予驗洞庭鄱陽知之如此

東爲中江入于海

孔曰有北有中南可知程氏禹貢論曰彭蠡爲南江無疑參北中之目而南江隱然在二語中此聖經之書法也夫江漢朝宗則共爲一瀆矣而北江中江寓分於合南江爲贛鄱之水誠不易矣今湖口於中歷九月江湖對流而湖水由石鐘山下傍南岸東流青水一條不混黃色即南江矣此予所目驗者又予門人有操商船業習長江水道者驗得江水自湖口以東夏秋則北岸之流盛冬春則南岸之流盛而中流四季皆急行船者於夏秋上水傍南岸下水則傍北岸冬春反是夫夏秋北岸水流之盛盛於漢冬春南岸之盛盛於鄱陽湖蓋一江之槽而流三江之水焉此足以明禹貢三江之說且

益見其以一稱三爲至精也

導沅水東流爲濟入于河

孔曰泉源爲沅流去爲濟鄭引地理志云濟水出河東垣縣王屋山東南至河內武德縣入河案漢武德縣今河南武陟縣境

溢爲滎

濟旣入河其伏者潛行地下絕河而南溢爲滎澤此與豫州滎波互相發明溢故波耳亦聖經神筆也滎澤久塞禹蹟當在今河南滎澤縣南今其附近有賈魯河乃後世所鑿

東出于陶丘北又東至于荷

陶丘在今山東定陶縣西南濟由滎澤伏流而東至陶丘北復出也自此一出不復伏遂東流注荷澤澤在定陶縣東北境其水東北流爲濟瀆又一枝東南流通泗今滎波陶丘之蹟皆湮其伏見之迹不可睹然濟瀆所經之地其下皆有伏流遇空竇即便涌出就其源委求之今猶有可考者齊氏水道提綱濟瀆源出王屋山頂曰天壇有泰一池渟泓不流即沅水東數十里出地東流此伏流之在源者也顧氏方輿紀要鈞突泉

在濟南城西南平地涌出高或至數尺爲濟水伏流重發處城內外類此者有金線泉珍珠泉舜泉孝感泉及杜康諸泉總凡七十有二此伏流之在委者也夫滎澤必大於鈞突諸泉其情狀則與鈞突諸泉當無異經所謂波與溢者今雖不可見然觀於鈞突之涌出平地高至數尺猶可想像得之說文陶字下引夏書曰東至于陶丘與此異或因謂滎澤定陶之間非伏流云

又東北會于汶

會汶在今山東東平縣西安山驛禹濟自蒗澤東北流由今鉅野鄆城嘉祥境中貫大野澤至此會汶

又北東入于海

禹濟故道由東平以下今爲黃河過濟南城而東流經章邱鄒平桓台高苑博興樂安諸縣由今小清河道入海

導淮自桐柏東會于泗沂東入于海

禹泗水具詳徐州貢道其合沂處在今江蘇邳縣南淮會泗沂在今淮陰縣即運河通淤黃河處由此以東在漣水阜寧之間今悉爲淤黃河道蓋自金元河奪淮入海而咸

豐五年河復北徙淮隨河塞也

導渭自鳥鼠同穴

爾雅釋鳥云鳥鼠同穴其鳥爲鶡其鼠爲鼯蓋鶡鼯同穴處此山故名耳導山從省曰鳥鼠

東會于澧又東會于涇又東過漆沮入于河

澧涇漆沮悉具雍州第澧與漆沮說者不一綜其同異難斷是非禹時故迹未必不異於今闕疑可也禹渭自長安以東之道胡氏渭言當行今渭水之北雍州渭汭亦在今渭口之北疑今朝邑趙渡鎮之洛口是其地今渭所行係漢時漕渠云

導洛自熊耳

漢書地理志弘農郡盧氏熊耳山在東上雒熊耳山在東北盧氏今河南盧氏縣上雒今陝西商縣洛源當卽上雒之熊耳今在雒南縣西然地理志言洛水出冢嶺山水經言出謹舉山皆與禹貢異齊氏水道提綱謂洛源附近連岡相接俗曰龍耳山疑卽禹貢導洛之熊耳

東北會于澗灑又東會于伊又東北入于河

澗灑之道洛之口嘗有變遷今所行未必是禹迹然與禹迹無大異以上凡九水疏曰凡此九水立文不同弱水黑水沆水不出於山文單故以水配其餘六水文與山連旣繫於山不須言水積石山非河上源記施功之處故云導河積石言發首積石起也漾江先山後水淮渭洛先水後山皆是史文詳略無義例也又淮渭洛言自某山者皆是發源此山欲使異於導河故加自耳

九州攸同

水中可居者曰州州之外水矧繞之先王欲大中國之土期於天下大同故謂國土爲州意在竟土之所至九州者分州畫爲九區也胡氏渭曰此總叙水土之功而先舉其凡

四隩旣宅

爾雅釋丘厓內爲隩蓋水厓之內也四隩猶言四海之內旣宅已安居也州畫爲九區而同之矣其四境之內可得而安居焉孟子曰當堯之時水逆行氾濫於中國蛇龍居之民無所定下者爲巢上者爲營窟使禹治之禹掘地而注之海驅蛇龍而放之菹水由地中行江淮河漢是也險阻旣遠鳥獸之害人者消然後人得平土而居之

九山刊旅

九山九州名山刊當作蔡義如隨山刊木旅舊說爲祭名義與蔡蒙旅平同明輝謂旅
齊通書秦誓旅力旣愆詩小雅旅力方剛兩旅字皆即齊齊呂同齊篆文呂古文故旅
呂亦通呂覽注淮南注皆云呂旅也說文呂脊骨也象形齊篆文呂从肉旅聲此九山
蔡旅與下文九州滌源屬辭之法實同九山蔡旅言九山之脊已蔡蔡者測定其高下
形勢耳周髀算經商高語周公曰數之法出於圓方圓出於方方出於矩矩出於九九
八十一故折矩以爲勾廣三股修四徑隅五旣方其外半其一矩環而共盤得成三四
五兩矩共長二十有五是謂積矩故禹之所以治天下者此數之所由生也漢趙君卿
注云禹治洪水決流江河望山川之形定高下之勢除滔天之災釋昏墊之厄使東注
於海而無浸溺乃勾股之所由生此可證禹以測量之法定高下形勢也經兩蔡字皆
屬山蓋登高則望遠可以規大地其用力少而成功多

九川滌源

九川九州大川也益稷篇禹曰予決九川距四海又曰濬畎澮距川畎澮在山爲谿谷
爾雅釋水注川曰谿注谿曰谷禹濬谷注谿濬谿注川卽此滌源也謂之滌者取其蕩

滌潔清禹貢錐指引陸氏深河汾燕閒錄曰晉水澗行類閩越而悍濁號怒特甚雖步可越處輒起濤頭作澎湃源至高故也夏秋間爲害不細以無堰塌之具耳嘗欲命緣水之地聚諸亂石傲閩越間作灘自源而下審地高低以爲疎密則晉水皆利也閩諺云水無一點不爲利閩水之爲利者盈科後進晉水之不爲利者建瓴而下耳又引朱氏國楨湧幢小品曰辛丑南歸經磁州徧野皆有水溝深不盈二二三寸澗可徑尺縱橫曲折隨地各因其便輿馬可跨而過禾黍蔚然異之間輿夫水何自來遙指西山曰此泉源也及問泉那得平流則先任知州劉徵國從泉下築隄障之高丈許隄高泉與俱高因地引而下大約高一尺可灌十里一州遂爲樂土明輝案此二條正合滌源之意然禹之滌源其法必甚備非可以此限之也

九澤旣陂

陂如隄障水使鍾於澤者川水主流澤主鍾水遇川水涸時泄澤水以益之川水有時氾濫則有澤以蓄而不爲害澤之陂所以爲蓄泄也九州之澤旣陂則九州之川皆得所蓄泄而不爲患

四海會同

四海九州之外四夷也爾雅釋地云九夷八狄七戎六蠻謂之四海會同會於京師而大同也四海會同則非獨九州攸同而四夷無不同矣四陝九州之內四海九州之外四陝同而宅之四海同而會之

六府孔修

左傳水火金木土穀謂之六府傳曰水火金木土穀甚修治言政化和正義曰由政化和平民不失業各得殖其資產故六府修治也胡氏曰此以下總結諸州土田貢賦之事六府者財用之源也六府之政不修則賦無所出貢無由作矣玉篇修字下引此作六府三事孔修三事者左傳云正德利用厚生謂之三事

庶土交正

庶土壤墳墟埴塗泥黎斥之類交正交相正以調和之使得稼穡之宜

底慎財賦

傳曰致所慎者財貨貢賦言取之有節不過度

咸則三壤成賦

史記夏本紀集解離斷如此王氏尚書後案云是鄭讀今從之土壤分上中下三品爲

則其九等之田由此細分之賦法三壤而成亦以上中下更分九等

中邦錫土姓

梅本中邦屬上讀鄭曰中即九州也明輝案錫土與姓分土建諸侯使世守之也錫土所以統地錫姓所以統人九州之內則然此是四隩既宅後事

祗台德先不距朕行

鄭訓台爲悅訓距爲違言諸侯敬悅天子之德既先又不距違我天子政教所行明輝謂此兩句爲結上起下之辭上自九州攸同以至中邦錫土姓皆祗台德先之事下自五百里甸服至聲教訖于四海皆不距朕行之實因先有九州攸同以至中邦錫土姓諸德已爲天下所敬悅故能由五服以推行於四海而無違此與大學所云德者本也義相合

五百里甸服

正義曰既言九州同風法壤成賦而四海之內路有遠近更叙彌成五服之事去帝都四面五百里規方千里之內謂之甸服服服王事也甸治田爲天子治田出穀也

百里賦納總二百里納銍

孔說此百里至後五百里皆甸服內地鄭說皆甸服外地總刈禾禾本全者銍斷去稟也胡氏曰諸侯以什一之法取民謂之賦出其所賦什之一市土物以上供天子則謂之貢天子所賦惟畿內

三百里納秸服四百里粟五百里米

秸禾既去稟又去其穎即用其穗也服服轉輸粟米之役也粟有殼米無殼不復言納蓋不自納於帝都第送至三百里地而使三百里之民服轉輸之役以達於都鄭說此五百里去帝都已千里堯制甸服賦納總禹彌其外又五百里而爲此五等之賦其百里之總蓋與內五百里相同云

五百里侯服

傳曰侯侯也斥侯而服事公羊傳隱元年疏引春秋說云侯之言候候逆順兼伺候王命孔說此帝都外千里鄭說千五百里

百里采

孔說此侯服內之百里鄭說在侯服外采孔馬皆訓爲事胡氏以爲采地江氏尙書集注音疏本禮記王制鄭注謂采者采取美物以當穀稅

二百里男邦三百里諸侯

朱子曰三百里謂自三至五爲百里者三隨文生例不可拘也男邦建小國諸侯大國次國

五百里綏服

綏安也此亦建諸侯以安王室孔說此帝都外千五百里鄭說二千五百里

三百里揆文教二百里奮武衛

孔說此綏服內地鄭說綏服外地文教至此而漸微故揆之武衛於此而益需故奮之至於武衛日拓則文教益遠不必於此交界也雅典尙文斯巴達尙武綏服兼之而分屬於內外蓋因地制宜耳此聖人之政也胡氏曰雅者王政之所由廢興方周之盛天保以上治內采薇以下治外即禹貢揆文奮武之事此說甚通夫王者之政武以爲前驅文以爲後勁自堯舜以來四千餘年聖化漸及於四夷中國由小而漸大血氣尊親之盛可操券於他日者即此內文外武之效耳

五百里要服

要者約束之義孔說此帝都外二千里鄭說三千五百里

三百里夷二百里蔡

孔說此要服內地鄭說要服外地夷易也無中國禮法易而已蔡放也放罪人於此胡氏曰春秋於介葛盧之朝魯直書曰來公羊傳曰何以不言朝不能乎朝也何注云不能升降揖讓蓋遠方之民未染華風其喜怒哀樂亦猶夫人耳但不能節之以禮子游之所云直情而逕行者也易之謂也

五百里荒服

孔說此帝都外二千五百里鄭說四千五百里荒又簡略

三百里蠻二百里流

鄭曰蠻者聽從其俗羈縻其人耳馬曰流行無城郭常居孔說此荒服五百里內地鄭說荒服外地孫氏星衍本五經異義謂今尙書歐陽夏侯說中國方五千里古尙書說五服旁五千里相距萬里明輝案鄭說禹弼成五服至于五千謂堯五服面二千五百里禹敷土既畢廣輔五服而成之至于千面方各五千里四面相距則爲萬里此與首句禹敷土爲能大中國之土義相應

東漸于海

傳曰此言五服之外明輝案漸入也進也浸潤也東入海而進之則太平洋大西洋及地中海無不爲此海字所包括如日本及美洲歐洲依次而爲聖化所浸潤矣此非必舜禹時事然必爲舜禹之所蘄夫文明進化無有已時大同之盛必見實事而其基礎立於舜禹聖化推行日廣即演繹舜禹之緒而引申之則此東漸于海直包舉後世而言非謂舜禹時已盡其事也

西被于流沙

被及也加也覆也流沙說者謂沙隨風流然漢人謂之翰海宋人則謂之旱海今西人地質學說言沙漠故皆海與旱海義正合疑禹時海猶未盡旱沙俱水流故曰流沙沈括夢溪筆談言流沙人馬履之百步外皆動如人行幕上其下足處雖甚堅若遇一陷則人馬駝車應時皆沒是必沙下有水故然被訓及則及於天山蔥嶺矣訓加則加於波斯阿拉伯矣訓覆則覆於撒哈拉矣此與漸海同義亦爲舜禹所蘄而後世推行之可見諸實事者也

朔南暨

朔南逗爾雅釋訓朔北方也說文朔月一日始蘇也明輝案古人知地圓又踰北極而

往周髀說仍謂之向北與今西說不同一日始蘇之月夜半時在對衝半球自中國河
域北行不踰半球可至其地故朔爲北方也暨顏師古漢書注訓及裴駰史記集解引
鄭注云南北不言所至容踰之明輝謂暨從旣得聲或可訓爲盡朔南暨盡其所至耳
如訓爲及當是南北各半球相及如東至地中海西至撒哈拉即東西相及也又考說
文暨日頗見也段注頗頭偏也頭偏則不能全見其面頗見者見而不全也明輝疑朔
南暨即今之南北極南北極各有半年不見日光其半年見日之時光亦甚微此與段
說許義正合且暨字从旦旦者日纔出甚低兩極見日之時日光常距地平線極近方
之中國僅有旦明正合暨字从旦之意也禹貢詳九州山川於四海止此東漸西被朔
南暨而已友人廖綬青世功嘉定人嘗語予禹貢爲地經中國志山海經則爲世界志予
甚韙之漢劉秀卽劉歆校山海經訖上奏言山海經者出於唐虞之際禹乘四載隨山
刊木定高山大川益與伯翳主驅禽獸命山川類草木別水土四岳佐之以周四方逮
人跡之所希至及舟輿之所罕到內別五方之山外別八方之海記其珍寶奇物異方
之所生水土草木禽獸昆蟲麟鳳之所止禎祥之所隱及四海之外絕域之國殊類之
人禹別九州任土作貢而益等類物善惡著山海經蓋禹貢獨詳夫九州而山海經則

訖于四海也

聲教訖于四海

孔傳聲教屬上讀斐駟讀屬下訖止也盡也四海九州之外孟子曰仁言不如仁聲之入人深也又曰善政民畏之善教民愛之夫威則三壤成賦善政得民之財也聲教訖于四海善教得民之心也以善養人天下悅而歸往故有四海會同之盛詩云自西自東自南自北無思不服蓋由於斯教推而放諸南海而準推而放諸北海而準推而放諸東海而準推而放諸西海而準也

禹錫玄圭

據竹書紀年司空禹治河堯七十五年事至八十六年司空入覲贊用玄圭史記言帝錫禹玄圭孫氏尙書今古文注疏以帝爲舜孔傳禹功盡加於四海故堯賜玄圭以彰顯之江氏尙書集注音疏云同宗子藩謂余曰漢武梁祠堂石刻畫像祥瑞圖云玄圭水泉疏通四海會同則至則玄圭乃治水功成之瑞應天所以寵錫禹者又徐孝廉承慶曰太平御覽八十二卷皇天部引尙書旋璣鈴曰禹開龍門導積石山玄圭出刻延喜王受德天錫佩是則玄圭乃錫自天非堯錫也聲謂據此二文則史記言帝錫禹玄

圭亦謂天帝不謂堯矣劉氏尙書今古文集解謂天錫禹玄圭猶箕子言天乃錫禹鴻範九疇陳氏今文尙書經說考曰三家師說或以玄圭爲天錫或以玄圭爲帝錫固有不同者矣其以爲帝錫者蓋玄圭之出本爲治水功成之瑞應禹得之以獻帝堯帝即以之錫禹也蔡傳以錫爲禹錫舜蓋本竹書紀年司空入覲贊用玄圭之文胡氏曰玄圭或以爲錫堯或以爲錫舜未知孰是時堯老舜攝蓋禹上之於舜而舜歸之於堯理當然也

告厥成功

舜典帝曰兪咨禹汝平水土惟時懋哉大禹謨帝曰兪地平天成六府三事允治萬世永賴時乃功左傳劉子曰美哉禹功明德遠矣微禹吾其魚乎吾與子弁冕端委以治民臨諸侯禹之力也史記舜謂四嶽曰有能奮庸美堯之事者使居官相事皆曰伯禹爲司空可美帝功舜曰嗟然禹汝平水土維是勉哉禹拜稽首讓於稷契與臯陶舜曰然往矣舜曰棄黎民始饑汝后稷播時百穀舜曰契百姓不親五品不馴汝爲司徒而敬敷五教在寬舜曰臯陶蠻夷猾夏寇賊姦軌汝作士五刑有服五服三就五流有度五度三居維明能信舜曰誰能馴予工皆曰垂可於是垂爲共工舜曰誰能馴予上

下草木鳥獸皆曰益可於是益爲朕虞益拜稽首讓于諸臣朱虎熊羆舜曰往矣汝
諧遂以朱虎熊羆爲佐舜曰嗟四嶽有能典朕三禮皆曰伯夷可舜曰嗟伯夷以汝爲
秩宗夙夜維敬直哉維靜絜伯夷讓夔龍舜曰然以夔爲典樂教穉子直而溫寬而栗
剛而無虐簡而無傲詩言意歌長言聲依永律和聲八音能諧母相奪倫神人以和夔
曰於予擊石拊石百獸率舞舜曰龍朕畏忌讒說殄僞振驚朕衆命汝爲納言夙夜出
入朕命惟信舜曰嗟女二十有二人敬哉惟時相天事三歲一考功三考黜陟遠近衆
功咸興分北三苗此二十二人咸成厥功臯陶爲大理平民各伏得其實伯夷主禮上
下咸讓垂主工師百工致功益主虞山澤辟棄主稷百穀時茂契主司徒百姓親和龍
主賓客遠人至十二牧行而九州莫敢辟違唯禹之功爲大披九山通九澤決九河定
九州各以其職來貢不失厥宜方五千里至于荒服南撫交趾北發西戎析枝渠度氏
羌北山戎發息慎東長鳥夷四海之內咸戴帝舜之功

禹貢注解終



禹貢注解考驗及校勘諸門人姓氏

川沙陸彭年	嘉定甘純權	漢川許祖謙	茶陵陳常	孝感鐘自統
襄陽張祖蔭	天門傅立綱	未陽劉攀桂	沔陽郭憲章	建始吳寄雲
平江李振華	應山丁中俊	沔陽廖立勛	宣城徐樹芳	潢川左其昌
隨縣劉國藩	黃岡陳奠球	長陽覃章哲	枝江熊心赤	漢陽張蕃
大冶劉維國	沔陽王韓康	孝感汪國縉	漢陽陳榮銓	沅陵劉紹元
蘄水袁曦鸞	甯遠張峻極	漢陽史煥章	武昌張士瑄	峽縣鄭鵬冲
諸暨鄭鶴春	安陸劉人驥	秭歸張允一	武岡龍正中	衡川周佐鼎
黃陂魏盛周	孝感張澤鰲	黃陂童傳鈔	黃陂涂允毅	峽縣錢學修
大冶程發軔	大冶賈策安	漢陽韓道之	沅陵呂賢鈺	漢川涂筠
邵陽李春榮	公安歐陽新	黃陂彭國珍	羅山王丙南	漢川林方蒸
吳縣吳毓鰲	荆門戴成龍	常甯廖吟茶	祁陽蔣作裘	高安塗峻
桃源關本嶽	甯鄉陳正方	高安吳有聰	醴陵童家恢	桃源鳳天毓

黃安馮德進 奉化沈昌佐 長沙沈開益 荆門方逢時 武昌王益昶

北流梁士楨 荆門錢明德 長沙盛澤沛 桐城吳勁 瀏陽羅孝忠

晉縣崔繼隆 當陽高揚勳 桂陽周正中 湘陰任協邦 零陵蔣元龍

長沙鄭業建 當陽張主權 黃陂吳錦芬 鐘祥張中鈞 晉縣尹鐘毓

平江方授楚 江陰徐德明 夏口向心葵 安化張光長 衡陽王凝度

灌雲袁正儔 安陸周人傑 蕪春張四維 岳陽廖鏞 丹徒黃成霖

桐城葉瑛 甯都楊繩武 襄陽王用中 鄭縣郭永年 夏口何欽明

新鄉王福壽 新鄉王忠敬 零都謝庾南 隨縣張漢聲 石門陳國謨

昆明龍成敏 江陵鄭先寬 江都諸光照 桐城朱光潛 桐城賀佐卿

寶雞王丕基 吳縣張宗文 懷寧程鳳墀 渭南劉樹瀛 華縣何偉文

解縣李文蔚 光山劉銀鑾 如皋劉蔭深 武進閔毅成 鄂城楊景炎

瀏陽黎書績 桐城崔兆麟 桐城王儒修 六合張維漢 慈谿葉杏林

鹽城王景明 阜甯袁義生 鹽城陳連章 當塗芮道昆 泰興吳健

石埭陳光炯 江甯張玉堂 桐城王訪漁 桐城魏滙川 當塗濮道興

句容曾廣西	鹽城黃學明	桐城陳遠芳	鹽城方紹章	宜興呂肇齊
嶧縣卜俊臣	鹽城薛國瑞	桐城劉其舒	桐城鮑鵬翰	桐城姚洛
乾縣高振鐸	泰興徐汝誠	漣水沈華山	鹽城王實培	宜興呂叔齡
資興李永欒	鹽城馬祖武	鹽城馬祖炯	鹽城王蔭培	武進薛叔和
鹽城吳世拱	如臯徐敬如	丹徒王豫立	鹽城嚴文英	鹽城吳義松
六合馬文啓	漣水卜耀亞	鹽城顧名	邳縣闔宗鐸	鹽城凌兆慶
松江孫世英	宜興張慕良	杭縣韓直慶	武進薛仲明	江甯王文熙
江浦徐鶴齡				

持志大學受課諸生

崇仁陳國勛	崇明金翰宗	吳縣蔣煥章	九江黎念劬	靖江謝承炳
如臯徐繩祖	上海顧克儉	涇縣胡道靜	崇明陳秋漪	崇明黃鼎昌
山陽楊士林	常熟龐穎	吳縣陳元麟	阜甯龐夢飛	石埭張嘉禾
常熟席德和	南通姚澈	無錫尤天爵	□□孫唯民	□□胡英會
上海吳雲秋				

羣治大學受課諸生

杭縣高德貴	泰縣仲明	鹽城嵇維寬	松江鄒潤梅	浦江石良炳
新登羅自強	泰興蔡光祖	崑明沈超人	海甯張進基	泰興王祥祚
阜甯全立三	嘉興時維鏞	松江楊寶鼎	松江顧關盛	邵縣譚福沛
會稽陶爲琛	杭縣毛奇	川沙陸修澄	閩南盧芹香	漢口李學慧

臨川吳旦

禹貢注解校勘記

十八八九之誤
二頁二行 □ 颶 颶颶之誤 □ 被於於于之誤 □ 大抵抵抵之誤 □ 十 □ 汜濫汜汜之誤 □ 十

二頁四行 □ 決汝決決之誤 □ 底績底底之誤 □ 十 □ 定陶改荷澤 □ 十 □ 荏平荏俗字在正

行 □ 今言言當作論 □ 底平底底之誤 □ 二 □ 宗於於于之誤 □ 二 □ 底貢底底之誤 □ 十

三行 □ 互干互互之誤 □ 二 □ 浮於 □ 逾於 □ 至於於于之誤 □ 二 □ 底績底底之誤 □ 十

四行 □ 三十 □ 甘蕭蕭蕭之誤 □ 三 □ 底績底底之誤 □ 八行 □ 不叙三叙俗字敘正字 □ 即叙

叙俗字敘正字
三十六頁五行 □ 底柱底底之誤 □ 三十七頁十行十 □ 衝決決決之誤 □ 四 □ 澧澧澧之誤 □ 四

十行十 □ 表行表表之誤 □ 四 □ 殷尙下脫能字 □ 四 □ 汜濫汜汜之誤 □ 五 □ 底愼底底之誤

五十六頁十一行 □ 錫士士土之誤 □ 五

禹貢注解附錄

七二

吳興讀經會出版書目

姚明輝著

孝經讀本

漢書藝文志注解

學記集義訓俗

大學讀本

反切源流考略


禹貢注解

上海圖書館藏書



A541 212 0011 0046B

民國十七年十二月一日



郵購本書郵票實足通用

頁

注解姚氏學

定價大洋二角

上海姚明輝

上海南翔耕讀處

吳興讀經會

四馬路青蓮閣對門

民益印刷所

